

REGIONAL NEWS

HEADLINES:-

1. Chief Minister Pu Lalduhoman Olympic 2036 a Mizo thalaite an inlan ve ngei theih na tura hmalak nan cheng vbc 2 leh nuai 50 dah a ni a ti.
2. Viksit Bharat Young Leaders Dialogue, Youth Festival 2025 neih zawh takah Mizoram atangin Grace Lalrinpari Hauzel chu Prime Minister hmaa presentation nei thei tura thlan a ni.
3. Prime Minister Narendra Modia chuan vawiin khan thiamna changkang hmanga sik leh sa dinhmun vilna Mission Mausam a hawng.
4. US-a Los Angeles khawpui kang avangin mi 26 an thi tawh.

<><><>

CM

Chief Minister Pu Lalduhoman Olympic 2036 a Mizo thalaite an inlan ve ngei theih nan vawiin atangin hma lak a ni dawn a, hemi atan hian cheng vbc 2 leh nuai 50 dah a ni a ti.

Aizawla infiammite tana Bana Kaih programme thar - Hand Holding Empowering Mizoram Sports vawiina Aizawla a hawnaah he thu hi sawiin Chief Minister chuan India ramin kum 2036-a Olympic thlen hun thlirin nikum khan Mizoram sorkarin Vision 2036 a kalpui tur a puang a, heta Mizoram infiammite an telna turin Empowering Mizoram Sports chu hmalakna pawimawh tak a ni ang a ti.

Chief Minister chuan Empowering Mizoram Sports hnuaiiah thalai thlan chhuahte hnenah training mai bakah infiamna kawnga ruhrel pawimawh neih belh an tum dawn tih a sawi a. Olympic Sports discipline, Mizote khelh theih chi, a ruhrel Mizoramin a la neih si loh lamah sorkarin mit a len dawn a. Empowering Mizoram Sports hnuaiiah induhsakna leh thil fel lo a inzeh a rem loh thu leh he hmalakna hi thingtlang kilkhawr ber thleng phak ni se a duh thu a sawi a ni.

Bana Kaih - Empowering Mizoram Sports hnuaiiah hian naupang theihna nei dap chhuahna hmahruai atan Tuichangral leh Tuipuiral Games huaihawt tan chhoh mek a ni tih hawna inkhawmah hian tarlan a ni.

<><><>

VC ASSN

All Mizoram VC Association (AMVCA) chuan VC term pawh tawi chungchanga sorkar an khinna tur an President Pu K. Lalngaizuala hmingin High Court-ah an thehlut leh.

Pu K. Lalngaizuala hian vawiin khan High Court-ah sorkar khinna tur writ petition an thehlut leh tih Akashvani zawhna chhangin a sawi a. High Court chuan tunkar Ningani, ni 16-ah hian a list dawn thu leh hemi ni vek hian an ngaihtuah nghal an beisei thu a sawi a ni.

Puan tawh angin AMVCA in sorkar an khinna ngaituah hun tura High Court in a ruat nimin khan AMVCA hi an inhnukdawh a. An inhnukdawh chhan pawh AMVCA chuan Akashvani hrilhin AMVCA chu kum 1986 atanga ding tawh ni mahse dan ang takin sorkarah an in register loh vang leh an case chu High Court in a hnawl a hlauhawm vang a nih thu an sawi a. An Ukil ten inhnukdawh mai thaa an hriat avangin an inhnukdawh ta tih an sawi a, vawiinah hian an pawl hming ni lovin an

President Pu K. Lalngaizuala hmingin sorkar khinna tur hi an thehlut leh ta a ni.

AMVCA hian nikum December thla atang khan sorkar atanga VC term pawhtawina nikum November ni 21-a a tihchhuah chu khin tumin hma an la tawh a. Village Council term kal lai tih tawi a nih thu hi Local Administration department thuchhuah ang chuan kumin February ni 19-ah a tawp dawn a. Financial year thar lo awm tura inthlan hautak tak tak pali awm tur tih zangkhaina tur leh sorkar in sum renchem a duh vangin Village Council term kallai chu thla 6 in a pawt tawi tih LAD Minister Pu C. Lalsawivunga chuan a lo sawi tawh a ni.

<><><>

TUALTE TOMATO

Mizorama Tomato thar chhuak tam ber khua Tualte chuan nikum 2024 khan Tomato Quintal 14,100 vel an thar chhuak a, 2023 leh 2022 a Tomato an thar chhuah te an phak lo a ni.

Tualte khuaah hian 2022 khan Tomato Quintal 23,851 thar chhuakin 2023 khan Quintal 15,000 vel an thar chhuak leh a. Nikum khan Tomato chingtu thenkhatin Tomato chin an bansan avangin kum hmasa lam aiin Tomato thar chhuah a tlakhniam phah deuh a, chungkaw 220 velin Tomato Quintal 14,100 an thar chhuak a ni. Tomato an thar chhuah te hi a vaiin an hralh thei a, hralh theih loh vanga tihchhiat a awm lo a ni.

Tualte khuain Tomato an hralhna man hi a inthlak ngun ve hle a, nikum kum tawp lamah khan Rate hi tlahniamin Kg.1 Rs.20/- ten an hralh chhuah a ngaih phah a, kuminah hian Tomato chin tum hi an pung chho leh a, nikum aiin kuminah hian Tomato ching an tam zawk an beisei tih Tualte Tomato Growers Co Operative Society hruaitute chuan an sawi a ni.

<><><>

VISION 2047

Sorkar laipuiin Vision 2047 ti hlawhtling tura a prog siam pakhat, Viksit Bharat Young Leaders Dialogue, Youth Festival 2025 neih zawh takah Mizoram atangin Grace Lalrinpari Hauzel chu Prime Minister hmaa presentation nei thei tura thlan a ni.

Viksit Bharat Young Leaders Dialogue, Youth Festival 2025 Mizoram team te hruaitu zinga mi, Dr. Rosaline Varsangzuali chuan Akashvani zawhna chhangin Viksit Bharat Challenge a tel a, presentation nei tur hian mi 3000 thlan chhuah an ni a ti a, hmarchhak state atanga an thlan awmchhun a nih thu a sawi bawk a ni.

Tun tuma thlanchhuah te hian Prime Minister Narendra Modi hma ah an ngaih mawh zawngte leh ram hmasawanna tur an veizawng te, an thupui theuh hmangin an sawi a ni.

<><><>

ZORO

Zo Re-Unification Organisation (ZORO) chuan zalen taka thenawm ram Myanmar nena inkalpawhna Sawrkar laipui thupeka khar ani chu pawl antih thu an sawi a, ramri khar mek chu hawn anih theih nan theihtawp an chhuah dawn tih a sawi.

He thu hi vawiina Aizawl Press Club-a thuthar lakhawmtute an kawmna ah sawiin ZORO Gen Secy Pu L. Ramdinliana Renthlei chuan kumin January ni 1 atanga Sorkar laipuiin a ken kawh thenawm ram Myanmar, tlawh leh kal theihna tur a permit neih a ngaih tawhna dan thar chu pawl

an tih thu sawiin theihtawpa an do dal zel tur thu a sawi a. Hemi chungchangah hian Human Rights Council Forum on Indigenous Issue-ah pawh an lungawi loh na an thlen tawh thu a sawi baw.

Sorkar laipuiin dan thar a siam hnuaiah hian phalna pe chhuak thei tura ruat chu Civil Officer emaw Magistrate-te ni loa Assam Rifle ruat an ni chu mak an tih thu ZORO chuan an Press Release-ah an tarlang baw a. Kum 2013 khan “United Nations Declaration on the Rights of Indigenous People” chu India leh ram dang 142 te pawmpuina in Human Rights Council chuan a adopt-a, ram ri khamin a dan te ho chu zalen leh in pawh taka an awm theihna chanvo nei an nih thu a tarlanga. Hetiang a nih lai a Sorkar laipuiin FMR a thiat hi ZORO chuan paw a tih thu leh zofate zalen taka an in kal pawh theih nan Free Movement Regime thiahna dan hi hnuk kir leh ngei turin India Sorkar laipui a ngen tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

IMD

India Meteorological Department, IMD dincham vawi 150-na vawiin khan Prime Minister Narendra Modi an thiamna changkang hmanga sik leh sa dinhmun vilna Mission Mausam a hawng.

Bharat Mandapam New Delhi-ah Mission mausam hi hawngin PM Modia chuan Mission Mausam chu ram hmanabak tluantling a neih theihna tur a ni a ti a. IMD in kum 150 chhunga zinkawng ropui tak an zawh chu tunlai science and technology khawvelah bungthar an kaina anih thu a sawi a. India mipuite tan rawng an bawl mai niloin science lama hmasawna entirtu an ni a ti baw.

Mizoramah pawh Aizawla ATI Auditoriumah Chief Secretary Pu Khilli Ram Meena hoin IMD kum 150-na lawmna hun hman a ni a. IMD hnuaia Aizawl Met Centre Director Pu Sudhir Kumar Dwivedi chuan thu sawiin hmarchhaka IMD regional centre ten sik leh sa ngun taka an vil thu leh hmarchhak state te tan hna ropui tak an thawh thu a sawi a. Hmarchhaka sik leh sa dinhmun chu danglam leh vil hautak tak a nih thu sawiin rim taka an thawh thin thu a sawi a. Tunlai thiamna hmanga IMD chu thawm chak zel a nih thu sawiin India ramah an inzarpharh zel dawn a ni a ti.

He hunah hian DDK News Director Pu Nambibou Marimbai bakah scientist leh sorkar hotu hrang hrang an tel a ni.

<><><>

US WILD FIRE

US-a Los Angeles khawpui kang avangin mi 26 an thi tawh. Ramkang avang hian mi 92000 chu hmun him lama sawn chhuah tura thupek an ni a, midang 89000 te chu inralring tura hriattir an ni tawh bawka ni.

Ram kang avanga thi zat hi an la pun rin a ni a. California-a cheng mipui sing 8 chuangin kawlpheha an nei lo a. California Governor Gavin Newsom chuan tuna kangmei chhuak an tawrh mek chu an ram chanchina khuarel chhiatna rapthlak ber a ni thei dawn tih sawin mitthi zat pawh ala pung dawn niin a sawi a ni.

<><><>